

Un Derecho pa Muri cu Dignidad

A Yega Ora pa Cambio na Aruba?

NA Aruba, e topico di eutanasia ta keda practicamente sin wordo menciona den maneho publico. Manera e situacion ta awo, eutanasia ta ilegal bou di e codigo penal di e isla—un postura hereda for di Reino Hulandes. Pero mientras e combersacion global ta evoluciona, specialmente den paisnan como Hulanda y Belgica, Aruba ta keda cu un pregunta dificil pero necesario: e derecho pa muri mester ser extendi na esnan cu ta sufri di malesa tanto fisico como mental?

Eutanasia ta legal na Hulanda bou di condicionnan estricto. Pashentnan mester ta enfrentando un sufrimento insoportabel y intratabel, y e proceso ta ensera multipel dokter, evaluacionnan psiquiatrico profundo (den casonan di salud mental) y un consentimiento voluntario y bon informa. Mientras cu mayoria caso ta fisico—cancer terminal, ALS of otro malesanan incurabel—un cantidad chikito pero significativo ta ensera sufrimento psiquiatrico. Na 2023, casonan psiquiatrico a representa solamente 1.3% di tur caso di eutanasia na Hulanda, pero cada un a pasa door di un proceso di evaluacion riguroso di lunanan largo.

Pues, dicon Aruba mester considera un paso asina?

E Argumento pa Sufrimento Físico Sufrimento fisico na final di bida no ta djis tocante dolor—e ta tocante dignidad. Hopi malesa terminal ta trece perdida di autonomia, identidad y e capacidad pa comunica of funciona. Eutanasia, ora e ta cuidadosamente regula, ta ofrece un opcion humano pa esnan cu ta sinti cu nan calidad di bida ta ireparabel. Door di no ofrece e opcion aki, Aruba ta nenga su residentenan e mesun escogencianan compasivo di final di bida cu ta disponibel na apenas algun ora di distancia na Hulanda.

E Argumento pa Sufrimento Mental Aki ta unda e debate ta bira

mas complejo. Condicionnan psiquiatrico manera depresion resistente na tratamiento of PTSD cronico por causa sufrimento agonisante y duradero. Algun pashent ta pasa door di añanan di terapia y medicacion sin ningun alivio. Nenga nan e derecho pa sikiera aplica pa eutanasia por sinti como invalida nan dolor. Pero sufrimento mental mester ser trata cu extremo cautela. P'esey paisnan cu ta permiti'e ta exige multiple evaluacion psiquiatrico, periodonan di espera largo y revisionnan profundo. Aruba por adopta salvaguardianan similar si un dia e considera legalisacion.

Siñando for di Hulanda E modelo Hulandes no ta perfecto, pero e ta ofrece lesnan balioso. Eutanasia eyan nunca ta ser tuma 'lightly'. Dokternan ta enfrenta un evaluacion legal y etico. E proceso ta altamente documenta y e autonomia di e pashent ta ser verifica repetidamente. E Hulandesnan ta reconoce tambe e riesgo di aplica e opcion aki na individuonan vulnerabel, specialmente esnan cu malesanan psiquiatrico, p'esey casonan asina ta rekeri un evaluacion mas profundo y terminonan mas largo.

E Oportunidad di Aruba pa Liderazgo Legalisa eutanasia no lo nifica core aproba tur peticion. E lo nifica establece criterionan cla y cuidadoso y duna hendenan sin otro opcion un escogencia humano. E lo nifica reconoce cu dolor mental por ta mesun incapacitante cu sufrimento fisico—y cu muri cu dignidad no mester ser reserva pa un solo tipo di malesa.

Aruba tin un chens pa lidera cu compasion, pa establece un ehempel regional den balansa autonomia cu etica. Kisas e tempo a yega no solamente pa habri e combersacion atrobe—sino pa cuminsa skirbi un maneho cu ta refleha humanidad, cuido y e derecho di scoge.

